



12. Tschanteda da la suprastanza cumünela in mardi, ils 16.8.2016 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi (a partir tractanda 107), Liun Quadri

Absaints: Jnes Barblan, Paolo Bernasconi (fin tractanda 106)

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 7.100 Ara Engiadin'Ota (ARO), dumanda regard regulaziun taxas e mantegniment nouva via d'access
4. 1.000 Autorisaziun da stipuler üna curvegna da prestaziun cun la regiun Malögia pel piazzament cumünavel e la gestiun da l'uffizi dal cudesch fundiari
5. 7.200 Schoglier associaziun ABVO e surder l'incumbenza da ramasser immundizchas a la regiun Malögia
6. 0.400 Proget rait da fibra optica da Mia Engiadina, credit fr.40'000.00
7. 0.110 Revisiun parziela constituziun cumünela, artichel 47 alinea 3, cifra 2 ed artichel 56 f (nouv)
8. 9.999 Varia

La glista da tractandas vain approvada sainza objecziuns.

Protocol: Il protocol da la tschanteda dals 03.08.2016 vain approvu unanimamaing.

105 0.211 Dumanda da fabrica Procedura da consultaziun incablamaint lingia da la RePower

La suprastanza piglia cugnuschentscha da la dumanda da la RePower per pudair incabler il sector chi'd es gnieu dannagio la lingia libra tres ün bösch in Plaun dals Senchs. L'uffizi chantunel per Energia e trafic pussibiltescha a la suprastanza da piglier part a la consultaziun. La suprastanza decida da piglier seguintamaing pusiziun: il lö, inua cha la lingia es dannageda e dess gnir incabla es i'l perimeter da l'ingrandiment da la deponia. La suprastanza scussaglia d'investir in quel lö per stuvair poch zieva spuster las lingias pervi da l'ingrandiment da la deponia regiunela. In quel sen vain piglio pusiziun dal fat.

**106 0.211 Dumanda da fabrica
Böhm Ralph, nouv paravent davaunt la porta chesa**

La suprastanza piglia cugnuschentscha da la dumanda da fabrica da Ralph Böhm per eriger ün nouv paravent davaunt la porta chesa sün parcella nr. 795 in Pradels. Zieva cuorta discussiun decida la suprastanza unanimamaing da conceder il permiss giavüscho cun pretaisas e cundiziuns.

**107 7.100 Chanalisaziun/sarinera
Ara Engiadin'Ota (ARO), proposta regard regulaziun taxas e mantegniment nouva via d'access**

Per planiser ils cuosts da gestiun ho la suprastanza da l'ara Engiadin'Ota (ARO) inoltro üna proposta regard la regulaziun da las taxas futuras e'l mantegniment da la nouva via d'access per l'ara chi nu vo pü tres l'areal militer, dimpersè giò per la via da la deponia/resgia e passa aunz la punt da Torno giò l'ara. Pel mantegniment da la via in Bos-chetta Plauna dess gnir miss in quint üna pauschela da fr. 3'000.00 l'an impü la partecipaziun als cuosts da la rumida da naiv dal trajet access via chantunela fin tar l'access da la resgia. Las taxas da l'attach da l'ova potabla tenor uorden da taxas. Per la chanalisaziun nu dess gnir prelevo üna taxa, per las immundizchas üna pauschela da fr. 1'300.00 l'an scu eir üngüna taxa per promover il turissem. Pels drets da passagi cul militer dess esser la vschinauncha respunsabla. Zieva animeda discussiun decida la suprastanza unanimamaing da piglier seguaintamaing pusiziun:

La taxa d'ova potabla dess importer pauschel fr. 8'000.00, la taxa da l'attach d'ova dess gnir facturo tenor reglamaint, la taxa da chanalisaziun nu po gnir elevada, siand cha la nouv'ara nun inviescha ova persa illa chanalisaziun publica. Impü es la suprastanza da l'avis, ch'üna taxa pauschela per an per las immundizchas ill'otezza da fr. 1'300.00 es in uorden scu eir üna pauschela scu taxa per proumover il turissem da fr. 1'000.00.

**108 1.000 Uffizi fundiari
Autorisaziun da stipuler üna convegno da prestaziun cun la regiun Malögia pel piazzamaint cumünaivel e la gestiun da l'uffizi dal cudesch fundiari**

Tenor ils statüts da la regiun Malögia, art. 6 alinea 2 dess gnir organisato il cudesch fundiari scu lezcha regiunela. La surdeda da quista lezcha a la regiun es planisada süls 1. schner 2017 cun üna convegno da prestaziun traunter mincha vschinauncha e la regiun Malögia pel piazzamaint e la gestiun dal cudesch fundiari. Avaunzs scu eir deficits chaschunos tres il cudesch fundiari vegnan spartieus sü tenor art. 33 alinea 1 traunter las vschinaunchas tenor la clev da spartiziun fixeda, analog ils oters uffizis chi vegnan mnos tres la regiun Malögia (procuratura professiunela, stedi civil, uffizi da scussiun e fallimaint). Fin uossa gnivan spartieus sü ils avaunzs ed ils deficits resguardand la cifra dals affers realisos sü'l territori cumünel da mincha vschinauncha. Tuot in tuot e resguardand il 2 ans passos vess la vschinauncha da S-chanf cun la clev da spartiziun nouva ün augmoint d'entredas tal conto taxas dal cudesch fundiari da 71% (2015) e 123.1% (2014). Zieva cuorta discussiun decida la suprastanza unanimamaing da propuoner a la radunanza cumünela da der l'autorisaziun da stipuler üna convegno da prestaziun cun la regiun Malögia pel piazzamaint cumünaivel e per la gestiun da l'uffizi dal cudesch fundiari cumünaivel.

**109 7.200 Alluntanamaint da las immundizchas
Schoglier associaziun ABVO e surder l'incumbenza da ramasser immundizchas a la regiun Malögia**

La situaziun da partenza s'ho müdeda fundamentelmaing per l'ABVO tres la decisiun dal pövel Grischun davart la refurma dal territori e la furmaziun da 11 novas regiuns chi resulta da que. Ils circuls da fin uossa, quel da l'Engiadin'Ota e da la Bergiaglia, vegnan scholts e fuorman insembel la nouva regiun Malögia. In conseguenza da quista

reorganisaziun dals circuls da fin uossa (Engiadina'Ota / Bergiaglia) e causa las incumbenzas novas chi resultan da que illa regiun Malögia scu eir tres la decisiun dal pövel positiva davart ils statüts da la regiun Malögia es l'ABVO gnida definida scu nouva incumbenza tenor l'art. 6.2 dals statüts. La consequenza es quella, cha la ABVO scu uniun d'interess vain scholta e cha sias incumbenzas da fin uossa vaun inavous a las vschinaunchas. Causa la nouva situaziun da partenza cun la regiun Malögia stöglan las vschinaunchas uossa stipuler üna nouva convegna da prestaziun davart il tema "allontanamaint da las immundizchas". Tenor l'art. 6 lit g da sieus statüts es que chosa da la radunanza da delegios da la ABVO da fer la proposta a las vschinaunchas da schoglier l'uniun d'interess i'l sen da l'art. 35 dals statüts da la ABVO in consequenza da la nouva situaziun da partenza. La radunanza da delegios da la ABVO dals 3 december 2015 ho approvu unanimamaing quista proposta e decis cotres da schoglier l'uniun d'interess. A basa da quista decisiun haun las singulas vschinaunchas da decider davart la liquidaziun da la corporaziun e stöglan a listess mumaint decider in occasiun da las radunanzas cumünelas / votaziuns a l'urna respectivas da transferir las incumbenzas correspundentas a la nouva regiun Malögia a basa d'üna nouva convegna da prestaziun. Oter cu fin uossa cun l'evasiun da l'incumbenza tres la ABVO, vain cun l'attribuziun da l'incumbenza a la regiun eir integro aint il nouv portfolio d'incumbenzas il servezzan da ramassamaint da la vschinauncha da Bergiaglia ed il servezzan da ramassamaint da la vschinauncha da San Murezzan. Ils cuosts (basa 2016) s'augmantan per 15% a CHF 2,53 milliuns. Tres il fat cha'l scumpart dals cuosts vain fixo da nouv tres la clef da repartiziun da la regiun e na pü tres la clef da repartiziun dal circol, s'augmanta la part da la vschinauncha da S-chanf) per circa 10-15%. La convegna da prestaziun aintra in vigur ils 1. schner 2017 e düra 4 ans. Sainza desditta vicendaivla cun ün termin preliminar da 6 mais as prolungescha la düreda da quella implicitamaing per ulteriurs 4 ans. Zieva animeda discussiun decida la suprastanza unanimamaing da propuoner a la radunanza cumünela da sancziuner la decisiun da la radunanza da delegios da la ABVO dals 3 december 2015 concernent il schogliment da la corporaziun e d'approver taunt il transferimaint da la gestiun dal rüt da la vschinauncha da S-chanf a la regiun Malögia scu eir la convegna da prestaziun respectiva.

**110 0.350 Corporaziun dals cumüns concessiunaris CEE
Preproget rait da fibra optica da Mia Engiadina, credit fr. 40'000.00**

La cumünaunza d'interess « Mia Engiadina » voul s-chaffir a lungia vista üna rait da fibra optica traunter Scuol e La Punt. La rait da fibra vain incabla da düraunt la lavur d'incablament tres la Swissgrid/OEE da las lingias da forza d'ota tensiun. Siand cha la viafier retica ho già hoz üna lingia activa da fibra optica as pudess realiser tscherts progets già uossa. Tenor il stüdi chi'd es gnieu elavuro l'an passo demuossa, ch'in nossa vschinauncha pudess gnir realiso il proget bain svelt, grazcha a la buna planisaziun dals schlargiamaints da l'infrastructura staun a disposiziun in nossa vschinauncha püs büschens vöds chi vaun lung la vschinauncha, büschens in possess da la vschinauncha, büschens da la Repower scu eir da la firma Salzgeber vöds chi vaun per part directamaing illas chesas per realiser ils attachs. Previs es eir da fer staziuns da W-Lan public in vschinauncha, uschè cha füssans üna da las prümas vschinaunchas in Engiadina chi realisess quista nouva tecnica. La vschinauncha mettes a disposiziun las lingias principelas tres vschinauncha scu eir las staziuns da scumpart bsögnaivlas. Ils attachs vi da las chesas füss chosa dals privats. Per caluler in detagl il proget haun la Repower e la Mia Engiadina suottamiss ün'offerta. Il stüdi preschaint füss la basa da partenza per las lavuors chi seguan düraunt l'an 2017 (prima fasa) e pels ans 2018-2019(seguond'e terza fasa) a Cinuos-chel, Chapella e Susauna. Zieva cuorta discussiun es la suprastanza unanimamaing da l'avis, cha la pü nouva tecnica da comunicaziun es sgür üna buna ed in mincha cas ün'attractiva spüerta per las firmas e pels abitants sül territori cumünel da S-chanf. La suprastanza decida da propuoner a la radunanza cumünela da deliberer ün credit da planisaziun ill'otezza da fr. 40'000.00 per invier il proget.

111 0.110 Legislativa
Revisiun parziela constituziun cumünela, artichel 47 alinea 3, cifra 2 ed artichel 56 f (nouv)

In l'ultima radunanza cumünela es gnieu comunicho il giavüsch, da numner üna cumischiun da turissem chi s'occupa in avegnir cun fats da turissem. Per cha la cumischiun po gnir numneda, stu quella esser previsa illa constituziun cumünela. Da l'an 2017 cumainza ün nouv trienni e la suprastanza cumünela pudess tscherner la cumischiun correspundenta. Ils seguaints 2 artichels dessan gnir revais (müdamaints marcos cun mellan):

Artichel 47

³A la suprastanza cumünela suprasto que da fer las seguaintas tschernas e nominas:

1. Our dal ravuogl dals suprastants: ils suprastants dals singuls decasteris e lur substituets.
2. La cumischiun da fabrica e la cumischiun da lavinas, il rapreschantant illa cumischiun dals fondos, **la cumischiun da turissem** e duos rapreschantants illa cumischiun per fats sociels.
3. Ils commembers dal büro electorel.
4. Ils impiegos e'ls funcziunaris cumünels, sainza la magistraglia.
5. Ils delegios in consorzis ed associaziuns.

Artichel 56

Per evader tschertas incumbenzas resp. per la cussagliaziun speciela vegnan instituidas las seguaintas cumischiuns permanentas:

- a) Cumischiun da planisaziun
- b) Cumischiun da fabrica
- c) Cumischiun da lavinas
- d) Cumischiun da fondos
- e) Cumischiun per fats sociels

f) Cumischiun da turissem

Zieva cuorta discussiun decida la suprastanza unanimamaing da propuoner a la radunanza cumünela d'accepter la revaisa parziela da la constituziun cumünela.

112 9.999 Varia

Il depüto dal decasteri da l'economisaziun publica orientescha sur dal stedi regard il proget d'üna halla nouva per la resgia. Cha tenor las offertas directives nu saja pussibel da fabricher üna halla chi fo il serv pel predschi chi s'ho previs. El spiega ils prossems pass.

A las 21.30 vain la tschanteda alveda.

In buna fè

L'actuar:

D. Schwenninger